

La carta de Santiago

Wa bateanare Santiago papera ĩ cõare gaye

1 ¹Ñati yu ñarã mua. Yu ña Santiago adi papera muare cõagũ. Diore moa ĩsiri masu ña yu. Ito bajiroti mani Uju Jesucristore cuni moa ĩsia yu. Adi macãrucũroju ña bate jedicoaju mani. Co masa ñabojanati, jãjarã masa bujucõri juã gubojeno masa buturi ña mani ĩja.

Diore mani seniãa ĩ masirise manire jidicãgũ yiguĩji, yire gaye

²Tuoya yu ñarã mua. Buto quenabeto mani tũbujaja cuni wanu quenaruja manire. ³Quenabiti manire ejabobarocati Diore mani tuorũnujama queno ña masicõri usirio yimenaji mani. ⁴Quenabeto mua tũbujaja cuni buto usiriobeja. Mani usiriobeja buto busa Diore masi warã yirãji mani. Ito bajiro ĩre masicõri, “Dise ruyabea manire”, yi tuoĩacõri queno wanu quenarã yirãji mani ĩja.

⁵Mua masibiti iti ruyaja Diore seniãa. Ito mua yija tuocõri, ĩsigũ yiguĩji ĩ. Rẽobicuti masa jeyarore ĩsigũ yiguĩji Dios. ⁶Ito bajibobarocati Diore mua seniãa, “Guareama ĩsibiquĩji”, yi tuoĩabesa mua. “ĩsibiquĩji”, mua yi tuoĩa wuõja jeyaro tuoĩarise wisaroja muare. Ide jacũrisere bajiro bajiroja mua tuoĩarise. ⁷⁻⁸Sĩgũ ito bajiro tuoĩa wuõgu, coji gaye riojo tuoĩagũ meje ñami ĩocũ. Jeyaro ĩ tuoĩarise rocati wisaroja ĩocũre. Ito bajiri, “Dios yure ĩsigũ yiguĩji”, ĩ yibojaja, ñe boca ãmibiquĩji ĩocũ.

⁹Gajeoni mana ñabobarãti Jesure mani tuorũnuja queno usi wanu quena ñaruja manire. Dios ĩ tija ñasarã bajiro ñarãji mani. ¹⁰Gajeoni jaigu cuni Jesure ĩ tuorũnuja ĩ ya usi wanu quenaroja ĩre cuni. Diore masicõri, “Ñasarise meje ña gajeoni”, yi tuoĩaguĩji ĩja. Gajeoni jairã go siniari go bajiro bajirã yirãji. Gajeoni jairã ñatĩñamenaji ĩna. ¹¹ũmacañi joejea wadiroca ĩ buto asiroca ta cuni siniacoacu. Go cuni sinia quedicoacu. Ito bajicõri quenarise iti ruyuja bero ruyubiticũ ĩja. Ito bajiroti bajiguĩji gajeoni jaigu ñabobaru cuni. Ito gajeoni niyeru wasoa ãmibojagu riti godacoagu yiguĩji ĩocũ.

Ñeñarise riti mani yi waja jeame wuroju warā yirāji mani, yire gaye

¹²Quenabeto tōbujabojarāti, Diore mani tuorūntūñaja queno wanu quenarā yirāji mani. Quenabeto tōbujagoana ñabojarāti catitūñare gaye boca amirā yirāji mani. “Yure mairāre catitūñare gaye isigū yiguja yu”, yicāni Dios. ¹³Ñeñaro yu yi amoroa, “Usirioro yami Dios yure”, yi tuoīabesa mua. Ñeñarise tuorūnbiquiji Dios. Ito yicōri mani ñeñaro yirise tuoīa usirio yibiquiji Dios manire. ¹⁴Ado bajiroja baja. Mani ñeñaro yirise mani ñeñaro tuoīarise iti tuoīa rētočū warā, ñeñaro ya mani. ¹⁵Iti ñeñarisejware mani tuo waja, ñeñarise yirāji mani. Ñeñarise riti mani yi waja, jeame wuroju warā yirāji mani.

¹⁶Queno tuoja yu ñarā mua. “Ñeñaro yu tuoīatoni usirioro yami Dios yure”, yi tuoīa wuobesa mua. ¹⁷Riojo tuoīare gaye quenarise ñarocōti Dios manire ī cūre ña. Iti ñami ūmacūju gaye busurise rujeoru. Busuriseama ūmua ña, ñami ña, gaje rumaama ide rāitfari ruma ña, bajicu. Itire bajiro wasoabiquiji Dios. Iti tuoīarise gaje tuoīa wu yibiquiji Dios. Quenarise riti tuoīaguji. ¹⁸Iti oca quenarise mani tuorūnucocati ruma catitūñare gaye isini Dios manire. Ito bajiri Dios rā ñasurāre bajiro bajirā ña mani ija. Ito bajiroti manire amoñi Dios.

Dios ocare tuocōri ñaro bajiroti cudiruja manire, yire gaye

¹⁹Adi Dios ocare acabojabesa yu ñarā mua. Jesure masicōri queno Dios ocare tuo wjarā ñaña mua. Queno tuoīamenati rocati busire ma. Ito yicōri yoari mejeti junisinire ma. ²⁰Mani junisinja, Dios ī tuo wanro bajiro yirā meje ya mani. ²¹Ito bajiri ñeñaro mua yi wjarisere jidicāña mua. Ito yicōri ñeñaro mua tuoīarise cūni jidicāja quena. Itire jidicācōri Dios oca mani ya wsiju ī cūcāre tuorūnrja manire. Iti ocare mani tuorūnja, mani ya usire masogū yiguji Dios.

²²Dios ocare tuocōri ñaro bajiroti cudiruja manire. Dios oca tuobojarāti mani cudibejama manimasiti ruoa mani. ²³⁻²⁴Dios oca riojo tuobojarāti mani acabojaja, sigū eoroju ī rūmū ticōri ī jidi jeoja bero acabojaguji. Ire bajiroti bajirāji mani cūni Dios oca tuobojarāti mani acabojaja. ²⁵Mani ya usire masoroc, quenarise mani tuoīatoni ī rotirise cūni Dios manire. Dios ī rotirisere mani acabojabeja, ito yicōri mani cudija, queno mani wanu quenaroca yigu yiguji Dios manire.

²⁶“Diore queno rucuboa yu”, yibojarāti mani rocati busi bateja, manimasiti ruoa mani. Ito bajiro mani yibojaja, ñe waja manija manire. Ito bajiro mani yija, “Diore rucubogū ña yu”, yi masimenaji mani. ²⁷Jacu godagoana, manju godagoanare cūni mani ejabaja, ito yicōri adi macārucuro gaye ñeñarise mani yibeja, Dios ī tija queno ire rucuborā ña mani.

Corocōti ti maija quena, yire gaye

2 ¹Tuoja yu ñarā mua. Jesucristo buto masigūre tuorūnrā ña mani ija. Ito bajiri gajeoni cutirā, gajeoni manare cūni corocōti ti mairja manire. ²Mua minijua ñaroca sigū niyeru jaigu quenarise yutabuju sñacōri, ito yicōri

ãmo sãñara bedo sãñacõri ĩ ejaja ticõri, ¿no bajiro ĩre tirãjida mua? Gãji bojoro bujagu yutabuju bucuro sãñacõri ĩ ejaja, ¿no bajiro ĩre tirã yirãjida mua? ³Gajeoni jaigure ti rucubworã, “Ado ña cumuro quenaro”, ¿yirãjida mua ĩre? Bojoro bujagu ĩ sãja ejaja, “Itoti rügõcõña, jacati rujiya mu”, ¿yirãjida mua ĩre? ⁴Ito bajiro mua yija queno corocõ masare ti maimenaji mua. Ito bajiro mua yija, “Ī ñami quenagũ. Ī ñami quenabicu”, yi beseado bajiro yirãji mua. Ñeñaro tuoĩacõri corocõ masare rucubwomenaji mua.

⁵Queno tuoya yu mairã mua. Gajeoni mana Diore queno tuorũnurã jãjarã ñarãji. Ito bajiri ĩnare beseñi Dios ĩ rotiroju, quenarise bujajaro ĩna yirocu. Dios ĩ goticãdo bajiroti ĩre mairã catitĩnare rucorã yirãji. ⁶Bojoro bujarãre queno maiguĩji Dios. Mũama ĩnare queno ti rucubwoea. “Gajeoni jairãti quenabeto mani tõbujaroca yama ĩna”, ¿yi masibeati mua? ĩna ñarãji ujarã tu manire ãmi wacõri seti yirona. ⁷Jesure tuo swyarã ñacõri, “Ī ñarã ña mani”, yi tuoĩa mani ĩja. Ito bajiri ĩ wame tuocõri queno wanu quenarãji mani. Niyeru jairãma Jesús wamere tuo terãji.

⁸Dios mani Uju ado bajiro rotiñi: “Mu ya rujure mu mairo bajiroti gãjerãre cuni maiña”, yi gotiñi Dios ĩ oca tutina. Dios rotirise mani cudija, queno yirã ñarãji mani. ⁹Ito bajibojarocati ñasari masare riti mani ti rucubwoja ñeñaro yirã ya mani. Ito bajiri, “Yu rotirise riojo cudirã meje ña mua. Ñeñaro ya mua”, yigu yiguĩji Dios manire. ¹⁰Dios rotirise cudi jeobjarãti, coji gaye mani cudibeja, Dios ĩ rotiro bajiro cudirã meje ñarãji mani. ¹¹Jane mejeju ado bajiro gotiñi Dios: “Manojo cutigu ito yicõri manojo macu cuni gãjerãre ĩ ajeja quenabetoja. Ito yicõri gãjerãre sãja quenarise meje ña”, yiñi Dios manire. Manojo cutibojaguti mani gãjerãre ajebitibojaja cuni, gãjire mani sãja, Dios ĩ rotirise ñarocõti cudi jeorã meje ña mani. ¹²Manire maso amogũ ĩ rotirise cũni Dios manire. Dios rotirise yiro robo mani cudibeja, mani ñeñaro yirise waja, waja senigũ yiguĩji ĩ. Iti masicõri mani busirotire queno tuoĩaja quena, ito yicõri mani ñaroti gaye cuni queno tuoĩa masija quena. ¹³Gãjerãre mani ti majia ticõri, ñeñaro masa ĩna yirise waja Dios ĩ waja seniri rumu manire ti maigũ yiguĩji ĩ. Gãjerãre mani ti maibeja, Dios cuni manire ti maibicu yiguĩji. Ito yicõri ñeñaro yire wajare buto senigũ yiguĩji ĩ manire.

Mani queno yirise ticõri, “Riti yure tuorũnurã ñama”, yiguĩji Dios, yire gaye

¹⁴Tuoya yu ñarã mua. “Diore rucubwogu ña yu”, yibojarãti, gãjerãre mani ejabuabeja, Diore rucubworã meje ña mani. Ito bajiro mani yija mani ya usi masobiquĩji Dios. ¹⁵Tuoĩate mua. Ado bajiro bajiroja. Sigũ mani yagu ĩ ñiocõja, ito yicõri yutabujuri bojoro ĩ bujaja ticõri, ĩre mani ejabuaja quena. ¹⁶“Queno waja, bare queno bujaba, ito yicõri yutabujuri bujaba”, yibojarãti bojoro bujagure mani ejabuabeja, ñe waja manoja mani busirise. ¹⁷“Diore rucubwogu ña yu”, yibojarãti gãjerãre mani ejabuabeja, Diore rucubworã meje ña mani. Ito bajiri ĩre rucubwobiticõri godacãna robo bajirã ñarãji mani ĩja.


¹⁸Yũ busirisere mua aja tudija, ado bajiro muare cudicuja yũ: “Jeyaro queno mua yirise yũre mua iõbeja, ‘Queno Diore rucubuoã ñama’”, yi masibicuja yũ. Yuama, jeyaro queno yũ yirise muare iõcuja. Iti ticõri, “Diore rucubuoã ñami”, yi masirã yirãji mua. ¹⁹“Dios sigũti ñami. Nijua gãji mami”, yi tuoĩarã ña mua. Ito mua yija quena ña itiama. “Dios sigũti ñami. Nijua gãji mami”, yirãji rãmúa cuni. Ito yicõri Diore giurã ruje nuruoarãji ña. Ito bajibojarocati ire cudirã meje ñama rãmúa. ²⁰Queno tuoĩabea mua. Rocati tuoĩa mua. Ado bajirojua baja. “Diore queno tuorũnua yũ”, yibojarãti gãjerãre mani ejabuabeja, Diore tuorũnrã meje ña mani. Ito bajiri Diore tuorũnubiticõri godacãna robo bajirã ñarãji mani. ²¹Mani ñicũ ñayoru, Abraham gayere muare gotigu ya yũ. Diore queno tuorũnũni Abraham. Diore yiari i macure siaboyijũ Abraham. Dios i rotirise cudicõri Diore yiari i macure soe isiboyijũ Abraham. Ito i yija ticõri, “Queno yigu ñami Abraham”, yiyijũ Dios. ²²Queno tuo masiña mua. Dios i rotirise queno tuorũncõri quenarise yiyijũ Abraham. Quenarise jeyaro i yigore Diore queno i cudire ito yicõri i yire tuocõri, “Diore queno tuorũnugũ ñaãni”, yi tuoĩa mani. “Diore queno tuorũnure gaye, ito yicõri jeyaro quenarise yire gaye, juaji ñasarise ña iti”, yi tuoĩa mani iti tuocõri. ²³Jane mejeju Dios oca tuti ucagu ado bajiro ucañi Diore goti isiri masũ: “Diore queno tuorũnuyijũ Abraham. Ito bajiri, ‘Queno yigu ñami’, yi tiyijũ Dios ire. ‘Dios baba ñami Abraham’, yiyijarã gãjerã”, yi ucare ña. Ito bajiri iti tuocõri, “Diore goti isiri masũ i gotire rêtacoaju”, yi tuoĩa mani.

²⁴Ito bajiri adi gayere masirãji mua: “Diore mani tuorũnũja, ito yicõri quenarise mani yija, manire boca amigũ yiguĩji Dios. Ire tuorũnubojarãti quenarise mani yibeja, manire boca amibicu yiguĩji Dios”, yi tuoĩa masirãji mua. ²⁵Rahab ñayoro gayere muare gotigu ya yũ. Rahab ñayoro wedi maso ñayijo iso. Judio masa ujũ i cõana, ña ejaja ticõri, ñare queno ejabuayijo iso. Ñare boca amiyijo iso. “Mua wajana muare siame, yũ ya wijũ sãja rudiya mua. Ito yicõri rudi wara ma muare goticoja yũ”, yiyijo iso. Ito iso yija ticõri, “Queno yigo ñamo”, yiyijũ Dios. ²⁶Rujũ usi manija cõrã rujũ ñaroja. Waja manija. Ito yicõri, “Diore tuorũnugũ ña yũ”, yibojarãti quenarise mani yibeja, Diore tuorũnrã meje ña mani. Ito bajiro mani yija, godacãna bajiro bajirãji mani.

Mani ya ñemerona jaje ñeñarise ya mani, yire gaye

3 ¹Yũ ñarã mua, sigũ ruyabeto Dios oca riasori masa ña amobojarãji mua. Ito bajibojarocati coriarãti i ocare riaso ñaja quenaroja. “Mani ñarocõreti waja senigũ yiguĩji Dios”, yire gaye ¿masibeati mua? Dios oca riasori masa gua ñajare i yiro robo gua cudibeja, bũto busa waja senigũ yiguĩji guareama. ²Mani sigũ ruyabeto ñeñarise yirã riti ña mani. No queno tuoĩacõri busiguti, queno yigu ñami iõcũ. I ya rujũ jeyaro i yi amorise cuni ñemecuti masiguĩji iõcũ. ³Cabarure tuoĩate mua. Jaigu i ñabojarocati i ya riseju come ma mani sãja, weatu masirãji mani. Ito bajiroti mani ya ñemero jaibiti ñemeroacã

ñabojarocati jaje ñeñarise ya mani, mani ya ñemerona. ⁴Cuma jajocare cuni tñoiate mua. Mino iti buto wēaja, cuma jajoca ñabojarocati weara jāi jaibiti jāiacāna weatu masirāji mani. Ito yicōri no mani wa āmoroti iti cumare weatu wa masirāji mani. ⁵Weara jāi jaibiti jāire bajiro bajiri jāi ña mani ya ñemero. Jaibiti jāire bajiro bajiri jāi ñabojarocati mani ya ñemerona jaje ñeñarise ya mani. Jeare tñoiate mua. Jea sīara waca co wacanati, jajo wesere soecōroja. ⁶Mani ya ñemero jea robo bajiro bajirise ña. Jaje ñeñarise ya mani, mani ya ñemerona. Mani ya rujū gaye, mani ñeñaro yirise rēto busaro ya ñemero. Mani ya ñemerona



(Santiago 3.3-4)

sūoriti jeyaro ñeñaro yirise mani ya rujure queda sājaroja. Mani ya ñemerona ñeñaro busicōri jeame ũjure cudi sūyarā yirāji mani. ⁷Gājerona jeyaro, āña, wūtīrā, riaca gāna, waibucurā jeyaro tirūnū masia mani. ⁸Ito bajibojarocati mani ya ñemeroreama tirūnū masibea mani. Mani ya ñemero ñeñaro iti yija ñemecuti masibea mani. Mani ya ñemerona āña rima iti juniro bajiro gājerāre buto ñeñaro ya mani. ⁹Jane mejeju masare rujeoyija Dios. Īre bajiro bajirā ña mani. Mani Jacu Diore oca quenarise busia mani, mani ya ñemerona. Ito bajibojarocati Dios ī rujeoanareti busitua mani, mani ya ñemerona. ¹⁰Mucana iti ñemeronati Diore rūcubuoā mani. Ito yicōri iti risenati gājerāre ñeñarise busitua mani. Yu ñarā ito bajiro mani yija, quenasabetoja manire. ¹¹Ide ũmaburi goje ide sūerise, ide quenarise rāca budi wuobetoja. ¹²Queno tnoya yu ñarā mua. Higuera wame cutiricu iti rica cutija, irimarā rāca rica cuti wuobetoja. Ito yicōri ũyēgu iti rica cutija, higuera rica rāca rica cuti wuobetoja. Ito yicōri ide ũmaburi goje ide ocarise iti budija, ocabiti rāca budi wuobetoja. Mani oca quenarise busija bero ñeñarise rāca busi wuobitiruja manire.

Mani queno ñaroti riti mani tñoiaja, masirā meje ña mani, yire gaye

¹³Riti queno tno masirā mua ñaja, ado bajiro queno yirāji mua. Quenarise riti mua yija quenaroja. Ito yicōri gājerāre mua ejabuaja quenaroja. “Gājerā rētoro queno seyogu ña yu”, yibitiruja muare. Ito bajiro mua yibeja ticōri, “Masirā ñama ña”, yirā yirāji gājerā muare. ¹⁴Mua ya usiju, gājerāre mua tno tudija, ito yicōri mua queno ñaroti riti mua tñoiaja, masirā meje ña mua. Ito bajiri, “Queno yirā ña gua”, mua yibojaja, riojo gotibiticōri ruore ocajuare gotirā yirāji mua. ¹⁵Ito bajiro mani tñoabojaja, Dios gaye wadire meje ñaroja iti. Ado robojua baja, adi macārucūro gaye ñaroja. Ñeñaro mani tñoarise gaye cuni ñaroja iti. Ito yicōri rūmū gaye wadire ñaroja

ñeñaro mani tuoïarise. ¹⁶Gãjerãre mani ti tudija, ito yicõri, “Ĩna rëto busaro masirã ña gua”, mani yi tuoïaja, gãmeri tuo wisarã yirãji mani. Ito yicõri jeyaro ñeñarisere yirã yirãji mani. ¹⁷Mani tuoïarise Dios gaye wadire iti ñaja, quenarise riti tuoïarã yirãji mani. Gãmeri ja ãmomena, oca quenori masa ñarã yirãji mani. Gãjerãre ejabuarã yirãji mani. Sīgũ ruyabeto corocõ riti ti mairã yirãji mani. Ito yicõri rocati ruomenaji mani. ¹⁸Manire ĩna ti tudibojarocati ĩnare mani oca quenoja bero queno usi cuti ñarã yirãji mani ĩja. Ito bajiro mani yija “Queno yijaro ĩna cuni”, yirã bajiro yirãji mani.

Adi sita gaye tuoïa wanubituruja manire, yire gaye

4 ¹¿No gaye wadiati mani ti terise, ito yicõri mani gãmeri tãrise? Mani ñeñaro tuoïarise gaye wadia iti. Quenarise yi ãmobarãti ñeñarise ya mani. ²Gajeoni ãmobarãti mua buja masibiti waja riojoti sia mua. Gãji ĩ rucorise ticõri ĩre uoa mua. Itire buja masibiticõri, gãmeri ja mua. Diore senibiticõri mua ãmorise bujabea mua. ³Ñeñaro mua tuoïaja ticõri, mua senibojarocati ĩsibeami Dios mware. Dios ĩ ãmoro bajiro meje senia mua. Diore mua senija, muamasi ye riti seniboja mua. ⁴Sīgõ romio manjũ rãca queno ñabecore bajiro bajirã ña mua. Dios rã ñabobarãti, adi macãrucũro gaye riti tuoïa mua. Diore bajiro tuoïamena, ito yicõri Diore tuo maimena robo bajiro bajia mua. No adi macãrucũro gaye buto tuoïagũ Diore tuoïabeami. ⁵Rocati meje ña Dios oca. Ado bajiro gotia: “Manire Espĩritu Santo queo sãni Dios. Buto manire tuo maiguĩji Dios. Ito bajiri ĩre riti mani tuoïare ãmoguĩji. Mani ñeñaro yirisere buto ti teguĩji Dios”, yi gotia ĩ oca tuti. ⁶Mani ñeñaro yirisere jidicãtoni manire ejabuagu yiguĩji Dios. Mani ñeñaro yi ãmorise itire mani yi uyabititoni, manire ejabuagu yiguĩji Dios. Ado bajiro gotia Dios oca: “Gãjerã rëtoro masirã ña gua”, yimenare queno ejabuami Dios. “Gãjerã rëtoro masirã ña guama”, yirãre queno ejabua ãmobiquĩji Dios. ⁷Ito bajiri Dios ĩ yiro bajiro cudiruja manire. Rũmũre cudibituruja manire. ĩre mani cudibeja ticõri, rudicoagu yiguĩji rũmũ ĩja. ⁸Diore mani tuoïaja ĩ cuni manire tuoïagũ yiguĩji. Mua ñeñaro yirisere jidicãña mua. Diore tuo maibobarãti adi macãrucũro gaye buto mua tuoïaja quenabetoja. Ito bajiri Diore riti tuoïaña mua. ⁹Mua ñeñaro yirise tuoïa bojori bujacõri otiya mua. Ñeñaro mua yirisere tuo wanurã ña mua. Ito bajibobarocati masa godagoana bajiro tuoïa bojori bujaya mua. ¹⁰Mucana mani Ujũre tudĩ mua tuoïaja quenaroja. “Dios ĩ tiro riojo ñe waja managuti ña gua”, mua yija quena. Ito bajiro mua yija ticõri, buto mware tuoïagũ yiguĩji Dios. Ito bajiri mware ĩ tija buto wanũ quenagũ yiguĩji ĩja.

“Ĩ ñami ñeñaro yigu”, yibituruja manire, yire gaye

¹¹Tuoya yũ ñarã mua. Gãjerãre busitubesa. Gãjerã Jesure masirãre mua busituja, ito yicõri mua rucubũobeja, “Dios ĩ rotirisere queno cudibeja yũ, ito yicõri queno rucubũobeja yũ”, yi tuoïarãji mua. “Dios rotirise quenabea”, mua yija, ĩ rotirise cudirãona meje ña mua. Ito bajiro mua yija, “Dios ĩ rotirise quenabea, cudibeja yũ”, yirãre bajiro ya mua. ¹²Dios

ñami ï rotirise manire cūrũ. Ito bajiri ï sīgũti ñaguĩji mani ñeñaro yirise waja, waja senigũ. Ï sīgũti mani ya usi godabore maso masiguĩji. Ï sīgũti mani ya usire ruyurio masiguĩji. Gãjire, “Ï ñami ñeñaro yiri masũ”, yi masirã meje ña mani. Dios sīgũti ñami, itionire masigũ.

Ija manire rëtaroti gayere masibea mani, yire gaye

¹³Noa, “Jane busuri, gaje rumũ gaje cutoju wacõri, co rodo moa ñacõri niyeru bujacija yũ”, yi tuoĩarã, yure tuoia mua. ¹⁴Ito bajiro tuoia busibitiruja manire. Jane, jane busuri, gaje rumũ manire rëtaroti masibea mani. Wajũ bueri robo bajiro bajirã ña mani. Yoari mejeti goaboja, godacoacu iti cuni. ¹⁵Ado bajiro mani tuoia ñaja quenaroja manire. “Dios ï ãmoja catirãji mani, ito yicõri ï ãmorisere yirãji mani”, mani yi tuoiaja quena. Ito bajiro mani tuoia ñaja quenaroja manire. ¹⁶Ito bajibojarocati mua rioti tuoia busia mua. Ito bajiro tuoiaja quenabea. ¹⁷Quenarise yi masibojarãti ñeñarise mani yija, quenabetoja manire.

Gajeoni jairãre Santiago ï goti quenore gaye

5 ¹Tuoia gajeoni jairã mua. Ija ñeñaro mua tũbujaroti gayere tuoia oti yuya mua. ²Gajeoni mua rucobojarise joga jedicoaro yiroja muare. Mua ya yutabujuri quenarise ñabojare cuni butua ba ecocoaro yiroja. ³Mua ya oro, mua ya niyeru ñabojare cuni gũda wiacoaro yiroja. Mua ya niyeru ito bajiro iti gũda wiaja ticõri, “Bojoro bujarãre ejabũabisĩ ñna”, yi tirã yirãji gãjerã. Mua ya gajeonire ito yicõri muare cuni jea soero yiroja. Jairo niyeru cutirã ñaboja mua. Ito bajibojarocati jabetacã ruya Dios masare ñeñaro yirise waja ï seniroti rumũ ejaroto. ⁴Mua ya ote weseri moa ïsibojanare cuni queno waja yibisija mua. Mua ya moari masare queno mua waja yibitire masiguĩji Dios. Mua ya moari masa ñna otija ito yicõri ñna awasãja cuni tuoĩni Dios ïmacũju rotigu. ⁵Adi macãrucũro ñarã dise ruyabeto rucoyija mua. No mua ãmoriseti yi ñayija mua. Wecure ñna sãaroto riojua jairo ïre ecarãji ï ucutoni. ïre bajiroti ucuyija mua cuni. Ito bajiri sãaraju ejacoaju ïja. Ñeñaro yirise waja seniroti rumũ eja wajũ ïja, ya yũ muare. ⁶Masa quenarãreti tubiara wijũ cõayija mua. Ito yicõri quenarãreti sãa rotiyija mua. No yi masibisijarã ñna muare.

Diore mani senija bero usiriobitiruja manire, yire gaye

⁷Jesũs ï wadiroto riojua queno tuoia yuya yũ ñarã mua. Ado bajiro tuoiaña adire: No otegũti usiriore mejeti ricare yuguĩji. Iti ï oteja bero cũma ide quediuro yiroja. Ito yicõri juebũcu ide cuni quediuro yiroja. Iti bero rica quenarise bujagu yiguĩji ïocũ. ⁸Ïre bajiroti tuoia usiriobesa mua cuni. Diore mua tuorũnarise jidicãbesa. Tuoia oca quedi yibesa. Mani Uju ï ejaroto jabeto ruya.

⁹Gãjerã rãca gãmeri junisinibesa Dios mua ya usire ï ruyuriobe yirona. Dios manire waja senirocu nocõ mejeti ejagu yiguĩji. ¹⁰Dios oca gotiri masare tuoiate mua. Ado bajiro bajiyiju ñnare: Diore busi ïsiyijarã ñna. Ito yicõri quenabeto tũbujabojarãti tuoia usirio yibisijarã ñna. ñnare bajiroti mani tuoia

usiriobeja quena. ¹¹“Ñeñaro tōbujabojarāti Diore jidicāmena queno wanu quenarā ñama”, yi tñoia mani. Job ñayoru, i tñoia oca jaibitirere masia mani. Quenabeto tōbujabojaguti Diore jidicābisí Job ñayoru. Quenabeto i tōbujaja bero Dios queno ejabuayiju ire mucana. Quenabeto mani tōbujaja manire tuo maiguíji Dios. Ito yicōri manire ti maiguíji i.

¹²Oca ñasarise muare gotigu ya, yu ñarā yu. “Ado bajiro yicuja yu”, mani yija bero ito bajiroti yija quena. “Yu goticato bajiroti yicuja yu”, mani yija bero, “Riti gotia yu Dios i turo riojo”, yibitiruja manire. Riojo mani gotija quena. Mani cūdibeja cūni riojo gotija quena, manire Dios i waja senime yirona.

¹³Mani ñeñaro tōbujaja, Diore busiruja manire. Mani wanu quenaja Diore rūcūbūorā basaja quena manire. ¹⁴Sīgū i cōja Jesure tūorūnūrāre ūmatā ñarāre jiruja manire. Cōgū tu ejacōri Diore busirāji ina. Ito yicōri cōgūre ūye tucōri Diore senirāji ina i tujatoni. ¹⁵“Ire yisioguíji”, yi tñoiacōri Diore ina senija, cōgū tujacoagu yiguíji. Ito yicōri ñeñaro yire waja i cōja ñeñaro i yirisere ācabojogu yiguíji Dios. ¹⁶Ito bajiri ñeñaro yicōri mua cōja, gājire mua gotija quena. Ito bajiro mua yija tuocōri, muare yiari Diore seni isigū yiguíji i, mua tujatoni. Queno yigu buto Diore i senija jaje quenarise rētaraja. ¹⁷Diore goti isiri masu Elfas wame cutigu, manire bajiguti ñayoñi i cūni. Diore tūorūnūcōri ire seniyiju ide quedibe yirocu. I senija bero ūdia rodo gūdarecocō ide quedibisiju. ¹⁸Mucana tūdi Diore i senirocaju ide quedisuoyiju mucana. Ito bajija bero queno bare rica cutiyiju.

¹⁹⁻²⁰Tūoya yu ñarā mua. Sīgū Jesure i jidicāja ticōri, mucana tūdi Jesure i tñoiatoni ire mani ejabūaja quena. Ito bajiri i ñeñaro yirise jaje ñabojarocati i jidicāja ticōri, i ñeñaro yirisere ācabojogu yiguíji Dios. Ito yicōri i ya usi ruyuriobicu yiguíji i. “Sīgū Jesure i tñoiaroca mani yija, iti ña ñasarise”, yi tñoia masia mani. Itocō ña.